

Sekolah Favorit

Ruwang tamu omahe Pak Bandung. Meja lan kursi ditata apik, mejane diwenehi taplak lan vas kembang.

- Dinda : (nulis angka ning buku, ngeling-eling, nulis maneh). "Wah...! kleru maneh." (njupuk setip dinggo mbusak).
- Ayu : (judheg sambat). "Wadhuuuuh ... aljabarku iki piye, Mbak Dinda? Waaah ..."
- Dinda : "Mengko dhisik ta ... Olehku nggarap matematika durung rampung iki!"
- Ayu : "Iki sedhela wae Mbak, mung sing iki lho!"
- Dinda : "Mengko dhisik! Dikandhani mengko dhisik kok ora nganggep, lungguha kana sik!"
- Ayu : "Ora suwe ta mbak!" (ngelungake buku maneh).
- Dinda : (nyingkirake bukune Ayu). "Wegah ... aahhh. Kana ta! Lungguha kana dhisik, mengko takkandhani."
- Ayu : (lungguh kursi karo mrengut).

Krungu swara umeg ing ruwang tamu, bu Marsidah banjur marani anake sing lagi padu.

- Bu Marsidah : "Ana apa ta, sore-sore kok geger ae?"
- Ngabdul : "Niki Bu, ... Den Ayu kaliyan Den Dinda nembe perang."
- Bu Marsidah : "Wis Dul, kana penggaweyanmu dirampungke dhisik, bocah loro iki takurusane."
- Ngabdul : "Inggih Bu."
- Ayu : "Mbak Dinda niki lho Bu, mboten purun ngajari kula nggarap tugas."
- Dinda : "Lha kula nggih taksih sinau lho Bu, nanggung."
- Bu Marsidah : "Mbesuk maneh yen arep njaluk warah golek selane mbakyumu, Yu. Awakmu uga Din, iki ora wancine sinau ta?"
- Dinda : "Kula sampun nate matur, menawi sesuk badhe tes mlebet sekolah favorit ta Bu!"
- Bu Marsidah : "Lha iya, sinau ki kena lan apik-apik eae, ananging carane kudu ditata. Ora angger arep ulangan lagi sengkud sinau lan arep tes lagi nyekel buku. Kaya mangkono kuwi ora bener. Sing apik, saben dina sinau sanadyan ora ketang sakjam."
- Dinda : "Inggih Bu."
- Bu Marsidah : "Lha awakmu arep mlebu sekolah favorit iki wis manteb tenan apa durung?"
- Dinda : "Pokoke kula isin menawi boten mlebu sekolah favorit Bu. Wong atase putrane Ibu kok nganti sekolah sak-sake, rak nggih makaten ta Bu?"
- Bu Marsidah : "Ibu ya isin yen nganti awakmu sekolah ing sekolahan sing ora favorit. Amarga ibu lan bapak rak ya wong sing *terpandang*. Yen awakmu piye Yu?"
- Ayu : "Menawi kula nggih sak ketampine Bu, ningali nilai kula kados pundi"
- Bu Marsidah : "Ora isa. Yen awakmu ora ketampa, ya golek cara supaya ketampa ning sekolah negri. Wis Din, saiki maraa menyang daleme paklikmu sing dadi Kepala Sekolah, matura yen diaturi Ibu."

- Dinda : "Nggih Bu." (*dinda banjur budhal menyang omahe Pak Pramana*).
- Bu Marsidah : "Saiki golekana bapakmu Yu, ning tegalan mburi. Bapakmu iki yen wis nandur, esuk sore sing diurusi mung tanduran, nganti lali yen duwe anak. Wis, ndang kana!"
- Ayu banjur ninggalake Bu Marsidah, nggoleki Pak Bandung ing tegalan mburi. Ora let suwe, Pak Pramana wis teka ing omahe Bu Marsidah bareng karo Dinda. Dinda banjur langsung mlebu menyang mburi.
- Pak Pramana : "Kulanuwun, Mbakyu."
- Bu Marsidah : "Mangga-mangga, Dhek Pram."
- Pak Pramana : (*karo ngguyu*) "Iya Mbakyu"
- Bu Marsidah : "Nuwun sewu ya Dhik Pram, aku ki arep nyuwun tulung panjenengan."
- Pak Pramana : "Nyuwun tulung apa Mbakyu?"
- Bu Wariyah : "Sesuk kuwi Dinda arep tes ing sekolahane panjenengan, mula yen bisa aku nyuwun Dinda ditampa ing kana."
- Pak Pramana : "Lha yen anggere lulus tes rak ya mesthi ketampa ta, Mbakyu."
- Bu Marsidah : "Sing tak karepake menawa Dinda ora ketampa, aku nyuwun tulung digolekne cara supaya bisa ketampa, panjenengan bisa ta?"
- Pak Pramana : "Wah piye ya Mbakyu, aku pakewuh, ajrih yen natoni penggalihe Mbakyu."
- Bu Marsidah : "Ora usah pakewuh, pira butuhe panjenengan lan kanca-kanca aku saguh."
- Pak Pramana : "Yen prakara iki aku ora bisa Mbakyu, amarga *pendaftaran* mlebu sekolah wis ditata, malah uga ana tim peneliti barang, supaya kabeh apik lan tumata."
- Bu Marsidah : "Aku ngerti, tim kuwi rak ya wong lumrah ta? Mbok menawa tim kena dibujuk nganggo dhuwit."
- Pak Pramana : "Nuwun sewu Mbakyu, yen konangan tim peneliti, aku bisa sara. Kanca-kanca uga mesthi ora kersa, aku bisa kelangan pagaweyan."
- Pak Bandung banjur mlebu ing ruang tamu.
- Pak Bandung : "Ealah Dhik Pram, ana apa iki?" (*sajak rada bingung*)
- Pak Pramana : "Iki lho Mas, aku disuwuni tulung Mbakyu, menawa Dinda ora ketampa, supaya golek dalan amrih Dinda bisa ketampa."
- Pak Bandung : "Wah yen kaya mangkono aku ora sarujuk. Arep piye ae kaya mangkono kuwi ora bener. Kajaba marahi elek, uga bisa gawe bocah dadi kegedhen rumangsa. Malah bisa njalari bocah wani marang guru, lan wibawane guru bisa mudhun."
- Bu Marsidah : "Nanging bocahe wis manteb Pak, arep mlebu ing sekolah favorit."
- Pak Bandung : "Lha yen wis manteb, wong tuwa ya kudu ngandhani sing apik lan menehi dalan. Ora malah dibombong supaya golek dalan liya sing ora becik. Dinda kudu dikandhani yen pengin sekolah ning sekolah favorit kudu pinter tenan lan lulus tes."
- Bu Marsidah : "Lha yen bocahe boten lulus? Kados pundi? Sing getun sinten? Rak nggih kula kalih panjenengan ta Pak?"
- Pak Bandung : "Wis-wis saiki Dinda timbalana mrene Bu!"

Bu Marsidah banjur nyeluk Dinda. Ora let suwe Dinda lan Ayu teka ing ruwang tamu.

Pak Bandung : “Din, apa bener yen awakmu pengen sekolah ing sekolah favorit?”

Dinda : “Inggih Pak.”

Pak Bandung : “Dak kandhani ya, sekolah kuwi ning ngendi-endi padha ae. Sing jenenge swasta, negri, favorit apa ora, padha wae olehe nampa pelajaran. Awakmu saiki kepengin sekolah ing sekolah favorit, ananging yen ora nate sinau, ora tau nggatekake pelajaran, ya padha wae. Sekolah kuwi sarana kanggo golek ngilmu, gumantung muride gelem nampa lan nggatekake piwulange guru apa ora.”

Pak Pramana : “Bener apa sing didhawuhake bapakmu, Din. Saiki awakmu kudu sinau sing sregep, supaya olehmu tes bisa lancar. Muga-muga awakmu ketampa, ning yen ora ketampa aja gela, bisa golek sekolah liyane.”

Dinda : “Inggih Paklik.”

Sawise mangkono Dinda banjur mlebu lan nerusake sinau, supaya bisa kasil anggone tes ing sekolah favorit sing dadi pepenginane. Wondene Pak Pramana, Pak Bandung, lan Bu Marsidah jagongan ing ruang tamu katon gayeng.

Sumber: *Gong Antologi Drama Modern, Festival Kesenian Yogyakarta XIV, anggitane Bondan Nuswantara*

KAMUS CILIK

- dibujuk = dirayu
- gayeng = asyik ngobrol
- pakewuh = tidak enak hati
- sarujuk = setuju
- sengkud = rajin

2. Mangsuli Pitakon

Pitakon-pitakon sing gegayutan karo geguritan ing dhuwur wangsulana kang patitis!

1. Sebutna paraga kang ana ing drama “Sekolah Favorit”!
2. Apa tema saka drama sing koksemak mau?
3. Andharna apa kang dikarepake dening Dinda!
4. Jlentrehna apa kang dikarepake dening Bu Marsidah, sawise ngerti sing dadi pepenginane Dinda?
5. Sapa sing dijaluki tulung Bu Marsidah supaya gegayuhane Dinda kasil?
6. Geneya Pak Bandung ora sarujuk karo panemune Bu Marsidah ngenani sekolahe Dinda?
7. Jlentrehna sing dikandakake Pak Bandung marang Dinda supaya gegayuhane kasil!

8. Gumantung sapa kasil orane siswa anggone golek ngilmu?
9. Saka ngendi sumber drama Jawa kanthi irah-irahan “**Sekolah Favorit**”?
10. Pitutur apa sing bisa kokjupuk saka drama kasebut?